

NA RUANA KEKEDELAA NIA A PAUL FUANA A TIMOTHY

¹ I nau a Paul, na aposol a Christ Jesus ana na kwaidooria nia a God, na e fale nau eeri kuka ainitalo ana mouria na nia e bae aalualu ana fuaga na tooa na gia manata mamana ana a Christ Jesus. ² I nau ku kekede fuamu a Timothy na o iilingia na wela rakediana nau.

I nau ku fooma eeri a God na Maa ma a Christ Jesus na Lord gia daaro ka falea na dianalaa ma na kwaimanataia ma na fanualama fuamu.

Na baelafea ma na kwaiareia.

³ I nau ku baelafea a God, na wane na ku rao fuana ma kuka haitamana langi kusi iilia doo ta'a, iilingia na koo nau gi da rao fuana. Ma i nau ku baelafe nia ana fe hato ma fe rodo si kada ku fooma ana ma kuka gania a God hai ka adomi oe. ⁴ Si kada i nau ku manatatoona na aangilaa baa o iilia, ku dooria asianaa hai kuka riki oe lau hai kuka eele agu. ⁵ Ma ku manatatoona na fiamamanalaa diana na o too ana, iilingia laugo na fiamamanalaa baa koo oe ni Lois ma ni tee oe ni Iunis daaro too ana. Sulia nau ku haitamana nia na o too laugo ana. ⁶ Nia naa, nau ku faamanatatoomu lau hai oko faarigita na falelala na a God e falea ana fuamu si kada baa ku aalua na abagu gi faafi oe. ⁷ Sulia a God langi si falea na Aanoedoo Aabu fuaga hai gia ka mou. Nia e falea na Aanoedoo Aabu eeri ka faarigita

gia ma eeri gia ka rakediana fuaga kwailiu ma eeri gia ka olosi gia i talaga.

⁸ Nia nae, langi osi ida uria na faamamanalana ana na Lord gia, ma langi osi ida laugo ani nau na wane na ku nii laona beu ni kanilaa sulia na raolaa nau fuana a Christ. Oko ainalongainia amu na Faarongolaa Diana, boroi ana gera faanonifi oe, sulia tara a God e falea na rigitaa fuamu uria na iililana. ⁹ A God e faamouri gia ma ka fili gia naa eeri gia ka aalua na tooa nia gi, langi lau sulia si doo gi na gia iilida. I nia e faamouri gia ma ka fili gia ana, sulia na manataa nia i talana ma si rakedianalaa nia i talana fuaga. I nia e falea na dianalaa nae fuaga ana a Christ Jesus, i nao ua na mai si kada e langi nia kasi haungainia ua ana tesi doo. ¹⁰ Sui, e faatai naa na dianalaa nae fuaga si kada naa ana na daolana mai na Faamouri gia a Christ Jesus. I nia e lafua naa na rigitalana na maea, ma ana na Faarongolaa Diana, nia ka faatainia na mouria na e afetai ka sui.

¹¹ Ma a God e fili nau eeri kuka hau ana ta aposol ma na wane faatolomai uria na faatalolaa ana na Faarongolaa Diana. ¹² Nia naa, nau kuka nonifi i laona na beu ni kanilaa uria si doo naa gi. Sui taa, nau ku manata ngado ua go agu, sulia nau ku haitamana na wane na ku fiitona. Ma i nau ku haitamana mamana hasa i nia e bobola go ana fai nia na fololaa usia si doo gi na e aaluda i abagu, lea ka dao ana fe dani na nia ka ooli lau mai. ¹³ Oko tasa dongaa uria manata mamananalaa ana na faatolomaia mamana na ku falea fuamu, ma oko roosulia, ma oko too ngado ana na fiamamanalaa ma na rakediana na gia too

ana sulia na oofulaa gia fai nia a Christ Jesus. ¹⁴ Ma ana na rigitalana na Aanoedoo Aabu na e too ani gia, oko aadasulia na doo diana gi na a God e aalua i abamu.

¹⁵ I oe o haitamana go amu naa na tooa gi sui i laona na bali fera i Asia da aabulo e'ete naa faasi nau. A Figelus fai nia a Hermogenes naa roo wane urinae. ¹⁶ A Lord ka manatania ana a Onesiforus ma na aebara nia, sulia nia e faanoni hahala nau ana si kada oro, ma ka langi si ida ana toolaa nau i laona na beu ni kanilaa. ¹⁷ Sulia si kada nia dao ana i Rom, i nia ka nani uri nau lea ka daotoogu. ¹⁸ Nau ku fooa eeri a Lord ka kwaimanatai ani nia ana fe dani na nia ka ooli lau mai. Ma oko haitamana diana naa si kwai'adomia oro baa gi nia e iilia fuagu lao fera i Efesus.

Na afetaia na a Timothy e naofia.

2

¹ Oe mala wela nau ae, oko rigita ana manata mamananalaa oe. Sulia e bobola fai nia oko iili urinae sulia na rakedianalaa a God fuaga na tooa na gia manata mamana ana Christ Jesus. ² Ma si doo gi na o rongoa ku faatolomainia fuana na tooa oro gi, oko falea fuada na tooa fiitooa gi na da bobola fai nia na faatolomailana lau fuana teni tooa aai gi lau.

³ Ma oko ado ana si nonifilaa sulia na raolaa oe fuana Christ Jesus, iilingia ta wane ana oomea diana nia. ⁴ Ta wane ni oomea, na e dooria haia ka faanonihahalaa na wane baita nia, ma e langi kasi aberosia i talana ana ta raa e'ete gi. ⁵ Ma

na wane ni lalaoa afetai ka saitasa lea so e langi kasi lea sulia na malutana lalaolaa. ⁶ Ma na wane na e rao rigita i hara, nia ka ngalia ana fuedoo moringa totongenao ana na doo gi na e gonida. ⁷ Oko manata sulia si doo gi na ku haea, sulia a Lord tara ka adomi oe hai oko haitamana na doo naa gi sui.

⁸ Oko manatatoona a Jesus Christ, na wane ana kwalafaa a David, baa a God e tataea faasia na maea, iilingia baa ku ainalongainia laona na Faarongolaa Diana. ⁹ Ma si kada nae, nau ku nonifii ma ku too i laona beu ni kanilaa iilingia ta wane baa e iilia tesi doo na e garo, sulia na ainalolaa ana na Faarongolaa Diana. Haia, ma na baelana a God afetai daka kani faafia. ¹⁰ Nia naa, nau ku maabe uria nonifii ana doo gi sui uria na dianalana na tooa gi na a God e aadafilida, eeri ni gera laugo daka ngalia na mouria sulia a Christ Jesus, fai nia na toolaa ana initooa firi i langi.

¹¹ Si baelaa e mamana baa e urii, <<Lea gia ka mae sui fai nia a Christ, tara gia ka mouri laugo fai nia. ¹² Lea gia ka tasa dongaa ana manata mamanalaa, gia ka initoo laugo fai nia. Ma lea gia ka kwaigoloi ana, nia tara ka kwaigoloi laugo ani gia. ¹³ Sui boroi ana lea so gia ka langi si iilia na kwaidooria nia gi, nia afetai ka lugasia taa naa nia haea tara ka iilia fuaga, sulia afetai nia ka langi si faamamanaa na baelana.>>

Na wane ni rao na a God e aalafaafia.

¹⁴ Oko faamanatatoona na tooa loko gi ana si doo naa, ma oko bae fifi fuada i maana a God, hai langi dasi oolisuusuu faafia na baea gi. Sulia

iililaa urinae langi kasi falea go ta doo diana, ma e nagaa go ana tooa na da fafurongo gi. ¹⁵ O hasi rigita hai a God ka eele faafia na raolaa oe, iilingia ta wane rao baa langi si ida ana raoa nia, ma na wane na e faatolomai o'olo ana baelana God na e mamana teefou. ¹⁶ Oko too faasia na uunuunu kaubarea gi, sulia si doo nae ka talaia na tooa gi faasia a God. ¹⁷ Gwounge na faatolomaia urinae e iilingia ta mae maala baa e harufia baita na nonina wane. Ma na roo wane na da faatolomai urinae gi a Haemeneas ma a Filetus. ¹⁸ Sulia daaro lea sui naa faasia na mamanaa ma daaro ka haea hasa na tataelaga faasia na maelaa e fuli sui naa, ma daaro ka nagaa urinae naa na manata mamanalaa gera teni tooa gi. ¹⁹ Haia, na faatolomaia a God e iilingia ta fou baita sulia nia e langi si gelogelo, ma na faatolomaia nae gi da kekede urii, <<A Lord e haitamana go ana na tooa nia gi,>> ma, <<Ni tei na e haea nia na doo a Lord ka aabulo faasia aade ta'ala gi.>>

²⁰ I lao luma baita, na doo ni fangalaa gi e oro i laona. Teni doo gi da haungainia ana gold ma na silva, ma teni doo gi daka haungainia ana na ai ma na hae gano. I aena naa teni doo gi e too uria fangalaa ana fe dani baita gi ma teni doo aai gi ka too uria malana go ana fe dani. ²¹ Ma lea so ta wane ka faafaalu nia i talana faasia na doo ta'a gi, nia ka iilingia na doo ni fangalaa ana fe dani baita gi. Sulia nia e aabutai nia i talana ma ka aade aagau ani nia uria na iililana ta raoa diana fuana na aarai baita nia.

²² Oko too faasia na kwaidooria ta'a wane daraa gi. Oko hasi rigita amu uria na o'oloa ma

na manata mamananaa ma na rakediana ma na fanualama, fai nia ni tei gera na lioda e folaa ma daka gania a Lord uria na kwai'adomilaa. ²³ Ma oko too faasia na oolisuusoo oewanealaa gi, sulia o haitamana na doo nae gi e haitamana ka haungainia na firufirua gi. ²⁴ Sulia na wane ni rao nia a Lord langi kasi too firufiru ni baea. Nia ka aade diana fuana tooa gi sui, ma ka faatolomai diana fai nia gwaromaabelaa. ²⁵ Ma nia ka hahaore fuana tooa gi na da take suusi nia si kada nia ka faatania na garolaa gera gi. Sulia tara a God ka bulasia oto na lioda hai daka haitamana na mamanaa. ²⁶ Ma gera ka manata ooli ma daka tafi faasia na tori nia a Satan, na wane na e dau faafi gera ma ka suungaini gera hai daka iilia na doo gi na nia e dooria.

Fe dani i'isi gi.

3

¹ Oko manatatoona tara na kada afetai gi ka dao mai ana dani i'isi gi. ² Ma na tooa gi tara gera ka nounou, ma daka faabaita gera, ma daka bae tataga. Ma ka langi dasi roosulia baelana maa gera gi ma ni tee gera gi, ma dasi baelafea ni tei na e iili diana fuada, ma daka aefaraa na doo a God gi. ³ Ma gera ka aade ta'a, ma langi dasi kwaimanatai ana tooa e'ete gi, ma daka suge faafia na tooa gi, ma daka dooria firulaa, ma daka hau ana na tooa kwasi gi, ma daka oote gera ana na doo diana gi. ⁴ Ma tara gera ka olea na maelana na tooa gi, ma langi dasi manata sulia na iililaa gera gi, ma daka lafe asianaa, ma daka

rakediana ada ana na kwaidoorilaa ana noni ma a God ka langi. ⁵ Haia, gera ka haea daka manata mamana, sui daka tofea ada na rigitaa nia a God. Lea doo oko too tau faasia na tooa urinae gi. ⁶ Ma teni tooa urinae gi na da ruu la luma gera tooa gi ma daka baita na ada usia na geni gi. Ma na geni nae gi, na garolaa gera gi ka faamakeso gera ma na kwalukaela kwaidooria ta'a gi ka baita faafi gera, ⁷ ma daka doori fafurongo tarau go ada uria haitamadoolaa, sui ka afetai daka haitamana na mamanaa. ⁸ Na tooa naa gi tara daka oote gera ana na mamanaa, iilingia a Janes ma a Jambres baa daaro oote daaro ana a Moses. Na tooa naa gi na manatalada e langi kasi rao o'olo, ma na manata mamanalaa gera e langi kasi mamana. ⁹ Haia, e afetai na tooa urinae daka iilia na kwaidooria gera gi, sulia na tooa gi sui tara da rikia naa na ooewanealada, iilingia baa e fuli ana a Janes ma a Jambres.

Si faatolomailaa i'isi gi.

¹⁰ Haia, i oe o roosulia naa na faatolomaia nau ma na aabulolagu ma si doo na ku hasi uria ana na mourilagu. Ma oko rikia naa na manata mamanalaa nau ma na gwaromaabelaa nau ma na rakedianalaa nau ma na tasa dongaalaa nau, ¹¹ ma oko rikia naa na nonifilaa nau gi. Ma oko haitamana sui naa si doo afetai gi sui na e iilia fuagu i laona na fera i Antiok ma i Ikonium ma i Listra. Sui, a Lord naa e adomi nau hai langi kusi mae. ¹² Ma so ni tei na e dooria na too o'olo laona na oofuofulaa fai nia a Christ Jesus, tara gera ka iinokesia. ¹³ Na tooa ta'a gi ma na wane faatolomai susuge gi tara daka hau

ana ta'a ka tasa, ma daka talai garo ana teni tooa gi aai ma i gera i talada laugo. ¹⁴ Haia, ma ni oe mone, oko lea dongaa amu sulia na mamanaa gi na oko manata mamana rigita na ana. Ma oe o haitamana go amu tei naa da faatolomai oe, ¹⁵ ma oe manatatoona e ita ana si kada baa o to'ou mai ana, oko haitamana na Kekedelaa Aabu gi na e bobola fai nia na falelana na liotooa haia ka talai oe uria na mouria sulia na manata mamanalaa ana a Christ Jesus. ¹⁶ A God naa na e falea na Kekedelaa Aabu gi sui. Ma na Kekedelaa Aabu gi ka diana uria na faatolomailana mamanaa, ma na olosilana si doo gi na e garo, ma na toolamailana na doo o'ololaa, ¹⁷ eeri na wane na e rao fuana a God, ka bobola uria na iililana na raoa diana gi sui.

4

¹ I nau ku gani oe i maana a God ma a Christ Jesus na wane na tara ka ketoa na tooa da mouri gi ma na tooa da mae gi, ma ka ooli mai hai ka aaofia. Haia, nau ku gani oe, ² eeri oko ainitalo ana Faarongolaa Diana. Ma oko aade aagau uria na iililana ana si kada gi sui. Ma oko bulasia na lioda na tooa gi, ma oko ngatafida, ma oko kwaiareida, si kada oko faatolomai ana gwaromaabea. ³ Sulia tara ka dao na ana si kada na tooa gi langi dasi fafurongo naa uria na faatolomaia mamana. Ma da dooria ada lealaa sulia na kwaidooria gera i talada, ma daka nani ada uria na wane faatolomai oro gi haia da haea na doo gi na da doori rongoa. ⁴ Ma gera

ka aabulo e'ete ada faasia na fafurongolana na mamanaa ma daka fafurongoa ada na uunuunua haungailana gi. ⁵ Haia, oe mone, oko susuli oe i talamu ana si kada gi sui, ma oko tasa dongaa ana raa oe boroi ana si kada afetai gi. Ma oko iilia amu na raa oe ana na ainalongailaa ana na Faarongolaa Diana, ma oko iilia na raa gi sui ana na raolaa oe fuana a God.

⁶ Haia, ma ni nau mone, e dao na ana si kada fuana daka haumaeli nau naa iilingia na kwaisuusilaa. ⁷ I nau ku faasuia naa na raolaa gi sui na a God e falea fuagu iilingia na wane na e lalao ma ka faasuia na lalaolaa, ma ku dau ngado na ana na manata mamanalaa. ⁸ Ma na kwaiaraa nau ka maasi nau naa, sulia na too o'ololaa nau. Ma a Lord, na wane ni ketolaa ana na o'oloo naa tara ka falea na kwaiaraa nae fuagu ana fe dani tara nia ka ooli mai ana. Ma taifili nau ka langi, ma na tooa gi sui na da rakediana fuana a Christ ma daka kwaimaasimaasia na faatailana mai.

Na faarongolaa nia a Paul.

⁹ Oko hasi rigita eeri oko dao ali'ali siagu. ¹⁰ Sulia a Demas e rakediana ana fuana dongaa na molaagali naa, ma ka tafusi nau ma ka lea na ana uria i Tesalonika. Ma a Kresens e lea na ana uria i Galesia, ma a Titus ka lea na ana uria i Dalmatia. ¹¹ Tee taifilia a Luke go na e too fai nau. Lea doo oko talaia mai a Mark fai oe, sulia i nia e bobola fai nia na adomilagu ana na raolaa. ¹² I nau ku oodua naa a Taekikus uria i Efesus. ¹³ Ma si kada o lea mai ana, oko ngalia mai na maku tekwa nau baa ku tafusia mai siana a Karfus i Troas. Ma oko ngalia laugo mai na

buka nau baa gi, ma tasa ana na buka diana nau baa gi na da haungainia ana na ungana na sipsip gi.

¹⁴ A Aleksanda na wane na e rao ana kakai halo gi, e falea na fiilaa baita asianaa fuagu. Ma tara a Lord ka duua si doo na nia e iilida. ¹⁵ I oe laugo, oko aadaada diana suli oe, sulia nia e oote nia asianaa ana na faarongoa golu.

¹⁶ Haia, ana na eetana si kada gera keto nau ana, langi ta wane kasi adomi nau go. Na tooa gi sui da eekwatai nau na ada. Nau ku fooma eeri a God kasi falea mone ana na kwaelaa fuada uria si doo nae. ¹⁷ Sui, a Lord naa e too fai nau ma ka faarigita nau eeri kuka bobola fai nia na ainitalongailana na faarongolaa loulou fuana tooa maadiu oro gi eeri daka rongoa ada. Ma a Lord ka faamouri nau faasia na kwaelaa ana na ui anilagu fuana doo fai ae kwasi gi. ¹⁸ Ma a Lord tara ka faamouri nau faasia na doo ta'a gi sui, ma ka ngali nau uria laona na Initooa nia i langi. Na initooa baita ka too fuana sulia dani firi! Amen.

Si bae dianalaa i'isi gi.

¹⁹ Nau ku falea na bae dianalaa nau gi fuana ni Prisila ma na aarai nia a Akuila, ma na aebara a Onesiforus. ²⁰ A Erastus e too i Korint, ma nau ku tafusia mai a Trofimus i Miletus, sulia nia e matai. ²¹ O hasi rigita hai oko dao i seenaa i nao ana si kada ana gwagwaria.

A Iubulus ma a Pudens ma a Linus ma ni Kladia, ma na tooa manata mamana gi ana a Christ sui na da too i seenaa, da falea laugo kou na bae dianalaa gera gi fuamu.

²² Nau ku fooma eeri a Lord ka too fai oe, ma na faadianalaa a God ka too fai gamu sui.

Lau New Testament

Lau: Lau New Testament (New Testament)

copyright © 1992 Wycliffe Bible Translators, Inc.

Language: (Lau)

Contributor: Wycliffe Bible Translators, Inc.

All rights reserved.

2020-11-23

PDF generated using Haiola and XeLaTeX on 21 Feb 2024 from source files dated 29 Jan 2022

04ff0905-6192-57c6-8d94-302e2c78a1da